



ALIJA
IZETBEGOVIĆ
M U Z E J

NEWSLETTER

JU MUZEJ "Alija Izetbegović" Sarajevo
Broj 3/2021 | Maj 2021.

2

AKTIVNOSTI

Najava izložbe
"Diplomatski put Alije
Izetbegovića" u galeriji
Preporod

...

4

AKTUELNOSTI

Posjeta turskog šefa
diplomacije Mevlüta
Çavuşođluu mezarju
Kovaçi

...

9

GODIŠNJICE

Godišnjica priznanja
nezavisnosti Republike
Bosne i Hercegovine od
strane Sjedinjenih
Američkih Država

...



FOTO: Arhiva Muzeja "Alija Izetbegović"

Muzej "Alija Izetbegović" objavio Javni poziv za prvi ciklus "Ljetne škole BH diplomatije"

Muzej "Alija Izetbegović" je 4. maja objavio Javni poziv za prvi ciklus "Ljetne škole BH diplomatije" koja bi počela 12. augusta 2021. godine na Međunarodni dan mladih.

Planirano je da predavanja i aktivnosti traju sedam dana i obuhvate 40 časova. Baza aktivnosti bit će prostor Homework Hub-a, koji predstavlja i strateškog partnera Muzeja "Alija Izetbegović" u ovom projektu. Ova ljetna škola ima za cilj da detaljnije upozna i educira polaznike o tematici bh diplomatije. Namijenjena je studentima/cama I, II i III ciklusa društvenih, humanističkih i političkih nauka. Predavači/ce su iskusni profesori/ce, ljudi iz prakse, diplomate, visoki dužnosnici, ali i drugi.

Petnaest odabranih polaznika ljetne škole će imati priliku da nauče više o tehnikama i metodama pregovaranja, komuniciranja, debatanja, ali i razmjeni mišljenja. Također, polaznici škole će imati zadatak da pročitaju i analiziraju određenu literaturu u vezi sa zadatom tematikom. Tokom trajanja ljetne škole, svi polaznici/e će dobiti određene zadatke, a po okončanju ljetne škole njihovi radovi bi bili objavljeni u Zborniku radova čiji je izdavač Muzej "Alija Izetbegović".

Nakon planiranih sedmodnevnih aktivnosti, predviđeno je da se aktivnosti polaznika nastave u okviru u kojem bi se učesnici podijelili u tri grupe, po pet učesnika u svakoj, te bi sa svojim mentorima participirali u kreiranju naučnog rada tematski vezanog za diplomatiju. Radovi bi na koncu projekta bili objavljeni u Zborniku radova. Učesnici bi imali imali slobodu odabira teme, koja bi bila suštinski srodna sa znanjima i iskustvima koja su stečena tokom trajanja ljetne škole. Muzej "Alija Izetbegović" ima plan da projekat "Ljetne škole BH diplomatije" preraste u tradicionalnu aktivnost sa visokim akademskim standardom, koja bi okupljala eminenta imena i učesnike.

Najava izložbe "Diplomatski put Alije Izetbegovića" u galeriji Preporod



FOTO: Arhiva Muzeja "Alija Izetbegović"

Muzej "Alija Izetbegović", povodom 30. godišnjice sudbonosnih događaja koji su se zbili maja 1992. godine, će upriličiti izložbu fotografija "Diplomatski put Alije Izetbegovića". Izložba će biti upriličena od 28. maja do 5. juna 2021. godine.

Na fotografijama koje su hronološki poredane na trideset panela posjetioci će imati priliku upoznati rad Alije Izetbegovića u kontekstu jačanja pozicije Republike Bosne i Hercegovine na međunarodnom planu.

Izložba će i tematski biti podijeljena na tri dijela: period prije agresije, ratni put i postdejtonsko razdoblje diplomatskog djelovanja prvog predsjednika Predsjedništva BiH.

U tom periodu su realizovani brojni diplomatski sastanci i aktivnosti koje su za cilj imale prevenciju agresije, a nakon što je ista otpočela, očuvanje opstojnosti i cjelovitosti Bosne i Hercegovine.

Otvorenje izložbe bit će upriličeno uz poštivanje svih epidemioloških mjera u Galeriji BZK „Preporod“ u petak 28. maja 2021. godine s početkom u 12 sati. Ulaz je slobodan.



IZLOŽBA FOTOGRAFIJA "DIPLOMATSKI PUT ALIJE IZETBEGOVIĆA"

GALERIJA BZK „PREPOROD“

OTVORENJE IZLOŽBE: 28. MAJ 2021. GODINE S POČETKOM U 12 SATI

ULAZ BESPLATAN

Posjeta turskog šefa diplomatije Mevlüta Çavuşođlu mezarju Kovači



FOTO: Agencija Anadoluja

Turski šef diplomatije Mevlüt Çavuşođlu je 4. maja 2021. godine, posjetom šehidskom mezarju Kovači, učenjem Fatihe i odavanjem počasti prvom predsjedniku Predsjedništva Aliji Izetbegoviću, započeo svoju zvaničnu dvodnevnu posjetu našoj zemlji.

Turska je figurirala kao jedan od najvećih prijatelja Bosne i Hercegovine u toku agresije na našu zemlju, što neupitno predstavlja i danas.

Odnos Turske prema predsjedniku Aliji Izetbegoviću najbolje se ogleda u riječima Predsjednika Recepta Tayyipa Erdođana koji je kazao: "U svakom razdoblju svog života išao je ispred svoga naroda. Svakome je pokazao da je borac za slobodu koji ne zna pokleknuti pred pritiscima, lider koji stoji na čelu svog naroda u borbi za nezavisnost, vođa koji je uspješnim vojnim i diplomatskim potezima uspio stvoriti državu. Obilježje po kojem se Alija razlikovao od svih drugih boraca za slobodu valja tražiti u svestranosti njegove uloge vođe. Prije političke neovisnosti, dao je podršku civilizacijskim vrijednostima svog naroda, i borio se da ove vrijednosti ponovno zažive na jednom intelektualnom planu".

FOTO: Arhiva Muzeja "Alija Izetbegović"



Drugi dan Ramazanskog bajrama - Dan šehida



FOTO: Arhiva Muzeja "Alija Izetbegović"

Sjećajući se onih koji su svoj život ugradili u temelje nezavisne Republike Bosne i Hercegovine, Rijaset Islamske zajednice u Bosni i Hercegovini je 23. januara 1995. godine donio odluku da se drugi dan Ramazanskog bajrama obilježava kao Dan šehida.

Svake godine u sklopu obilježavanja Dana šehida, delegacije odaju počast svim šehidima na Mezarju Kovači učenjem Fatihe, što je i ove godine bio slučaj, uz poštivanje svih epidemioloških mjera.

U svom obraćanju polaznicima seminara Uprave za moral Štaba Vrhovne komande Armije Republike Bosne i Hercegovine, 9. decembra 1993. u Sarajevu, Alija Izetbegović je kazao:

"Vidite, ovaj rat je pokazao neke čudne stvari. Vi čujete za nekog junaka i ako se malo zainteresirate za tog čovjeka, obično saznate da je to bio neki radnik ili neki mali službenik, jednom riječju jedan mali, obični čovjek. A onda je došao rat i pokazao šta je on ustvari. Dogodilo se, naime, da mnogi obični mali ljudi od kojih niste ništa posebno očekivali nego da budu radnici sa svojim strugom ili činovnici tamo za nekim stolom, dobri roditelji itd., da su postali heroji. Sjetite se jednog Ramiza Salčina rahmetli, ili Safeta Zajke, pa i mnogih drugih. Ovaj rat je učinio da smo mi vidjeli koliko u nekim malim tzv. malim ljudima ima istinske veličine. Rat je, nažalost, pokazao i obrnutu stvar: koliko opet u onim galamdžijama, onim vikadžijama, onim što vole velike parole i velike riječi, koliko su to ponekad sitni ljudi, jedan veliki broj njih, kada je zagrmjelo, pobjegli su."



FOTO: Reuters

Preminuo Jovan Divjak – general Armije Republike Bosne i Hercegovine

U Sarajevu je u 84. godini, 8. aprila 2021. preminuo bivši general Armije Republike Bosne i Hercegovine Jovan Divjak.

Divjak je rođen 11. marta 1937. godine u Beogradu, gdje je završio 12. klasu Vojne akademije u Beogradu, kurs za komadanta bataljona, Komandno-štabnu akademiju i Ratnu školu. Predavao je u Vojnoj školi u Sarajevu. Rat ga je zatekao na dužnosti oficira u štabu TO BiH. Postao je brigadni general Armije RBiH i pomoćnik načelnika Glavnog štaba Armije Republike Bosne i Hercegovine. Prvi je nosilac najvišeg francuskog ordena, Legije časti iz Bosne i Hercegovine.

Vidjevši da JNA naoružava srpske paravojne formacije i civile, odlučio je da oružje iz Kiseljaka preda Teritorijalnoj odbrani BiH, kako ga JNA ne bi zloupotrijebila. Vojni sud JNA ga je 1991. osudio na 9 mjeseci zatvora zbog izdavanja oružja TO BiH. Kaznu je izbjegao napustivši JNA, nakon čega se pridružio Armiji Republike Bosne i Hercegovine.

Sjećamo se ovom prilikom 3. maja i otmiče predsjednika Predsjedništva RBiH Alije Izetbegovića kada kolona vozila biva zaustavljena u Dobrovoljačkoj ulici. I dok Alija Izetbegović iz transportera na koji se Jovan

Divjak popeo traži od njega da kolona nastavi kako je dogovoreno – čuje se pojedinačna i rafalna pucnjava nedaleko od tog mjesta. Televizijski snimak koji prikazuje Divjaka kako viče: "Ne pucaj! Ne pucaj! Ne pucaj!" ostat će zauvijek urezan u sjećanje građana Sarajeva i Bosne i Hercegovine.

U Parizu je na francuskom jeziku objavljena knjiga njegovih razgovora pod naslovom "Sarajevo mon amour" (Sarajevo moja ljubavi). Osnovao je i ugradio sebe u fondaciju "Obrazovanje gradi BiH". Suprotstavio se srpskoj propagandi u manipuliranju srpskim žrtvama u Sarajevu, odbivši svaku pomisao na masovna stradanja Srba, ističući da su Srbi u Sarajevu pretežno stradali od srpskih granata, a da nad Srbima nije vršen planski ili sistematski zločin.

"Ja sam i dušom i srcem za Vašu Republiku Bosnu i Hercegovinu", napisao je Divjak na kraju pisma kojeg je u maju 1993. godine poslao Aliji Izetbegoviću, tada Vrhovnom komandantu OS RBiH. Divjak je bio i ostao dušom i srcem za Bosnu i Hercegovinu.

Čestitka za 1. maj – Međunarodni praznik rada

Muzej "Alija Izetbegović" je uputio iskrene čestitke povodom Međunarodnog praznika rada svojim uposlenicima, poslovnim partnerima ali i svim ljudima na kojima opstaje ekonomski poredak naše države.

Alija Izetbegović se u toku svog života bavio pravima radnika i ekonomskim odnosima, te je jedne prilike kazao: "Čitava historija je, uz borbu za slobodu, i borba protiv siromaštva. Ne možemo se zalagati za to da naš narod ostane siromašan, ali ne možemo ni tolerirati bogaćenje korupcijom ili izbjegavanjem poreza. Jedna sposobna i dobronamjerna vlast naći će rješenje, koje možda neće biti savršeno ni sasvim čisto – takvo što ne postoji – ali koje će zaštititi najveći interes najvećeg broja ljudi."

Čestitka za Bajram

Muzej "Alija Izetbegović" svim muslimanima u Bosni i Hercegovini i dijaspori je uputio iskrenu čestitku povodom Ramazanskog Bajrama - Bajram Šerif Mubarek Olsun.

"Tekbir i selam ne smetaju demokratiji. Prvi slavi Boga, a drugi priziva mir. Kome to može smetati i kakva je to ideologizacija? U Bosni za kakvu se mi borimo niko neće biti prisiljavan da vjeruje ili ne vjeruje, niti će biti progonjen zbog svoje vjere, nacije ili političkog uvjerenja. Ako se budem pitao, stavit ćemo ove riječi u preambulu našeg budućeg ustava", kazao je Alija Izetbegović u jednom intervjuu 12. februara 1995. godine.

Čestitka za Uskrs

Muzej "Alija Izetbegović" je svim katolicima u Bosni i Hercegovini uputio iskrene čestitke povodom značajnog kršćanskog praznika - Uskrsa.

Smisao uskrsa je slavljenje života i obnavljanje porodičnih veza.

Čestitka za Pesah

Muzej "Alija Izetbegović" je uputio iskrene čestitke svim Jevrejima sa željama da ga provedu u blagostanju i sreći. Pesah se praznuje u spomen na oslobođenje Jevreja iz Misirskog ropstva. Također značaj Pesaha se i ogleda kroz vezu sa hodočašćem koje se može obaviti u toku trajanja ovog praznika, za sve one koji su u mogućnosti.

Slavlje ovog praznika tradicionalno počinje noć prije prvog dana obilježavanja tradicionalnom "Seder večerom". U toku večere hrana je servirana na posebnoj vrsti tanjira, a čitava trpeza je sastavljena od jela koja simboliziraju jevrejsko ropstvo u Misiru. Običaj je također da vrata kuće tokom večera ostanu otvorena, kao znak dobrodošlice svakom gostu namjerniku. Čitanje Hagade je nezaobilazan dio ove tradicionalne večere.

Čestitka za Vaskrs

Muzej "Alija Izetbegović" svim vjernicima pravoslavne vjeroispovijesti uputio je iskrene čestitke povodom jednog od najznačajnijih hrišćanskih praznika – Vaskrsa.

Smisao i poruka Vaskrsa je slavlje pobjede svakog dobra nad zlom, smirenja nad gorđošću, istine nad laži, vjernosti nad izdajom i slobode nad nepravdom.

"Bosna i Hercegovina jeste most između civilizacija, kultura i religija... Kroz ovakvo preplitanje, velike civilizacije u prošlosti uspjevale su postići visok stepen razumijevanja. I mi moramo ići tim putem. Sukob civilizacija nije neizbježan. Naprotiv, one bi mogle da nađu zajedničke korijene i priznaju zajedničke vrijednosti koje pretežu nad razlikama. Bosna i Hercegovina je mjesto gdje se testira sa svim rizicima ova mogućnost. Umjesto da bude poprište sukoba, Bosna i Hercegovina može biti mjesto gdje možemo graditi društvo u kojem će prevladavati tolerancija i uzajamno poštovanje."

(Iz obraćanja na susretu Most, Sarajevo, 17. august, 1998. godine)



FOTO: Unsplash.com

Stavovi Alije Izetbegovića o Al-Qudsu (Jerusalemu)

Usljed eskalacije nasilja prvenstveno u Jerusalemu, a zatim širom Zapadne Obale i pojasa Gaze, ovoga puta podstaknutim ilegalnim deložacijama Palestinaca iz njihovih kuća u naselju Sheikh Jarrah, Muzej "Alija Izetbegović" želi iskazati podršku palestinskom narodu u njihovoj borbi za osnovna ljudska prava koja se sistematski krše od 1948. godine.

Ovom prilikom, Muzej podsjeća na prijateljske odnose rahmetli predsjednika sa liderom PLO Yasserom Arafatom.



FOTO: Arhiva Muzeja "Alija Izetbegović"

S tim u vezi, također treba podsjetiti na stavove Alije Izetbegovića o problemu Al-Qudsa objavljene u članku "Muslimani i Izrael" 1970. godine:

"Jerusalem nije običan grad. To je jedinstven grad u kojem tri velike svjetske religije imaju svetinje, kojih se ne mogu odreći. Ko može osigurati slobodan Jerusalem, otvoren podjed-

nako svima? Teorijski i praktički, to mogu samo muslimani. Teorijski, jer jedini islam priznaje Musaa i Isaa, Evanđelje i Toru, dok, obratno, kršćani i Jevreji ne priznaju Muhammeda i Kur'an. Ova činjenica je element nadmoćnosti muslimana u ovom pitanju."

"Jerusalem je za sve vrijeme islamske vlasti bio slobodan grad za sve tri religije. Stanje neslobode u njemu podudara se sa odsustvom muslimanske vlasti."

"Pošto smo bili janjad, oni su postali vukovi. Budimo stoga snažni, i radi nas i radi njih i radi mira u ovom dijelu svijetu. Ali naglasimo: ne zato da bi sutra Jerusalem bio samo muslimanski, nego da bi ponovo bio otvoren svima i da bi ostao nepomučen izvor iz kojeg teku tri velike rijeke čovječanstva."




FOTO: Arhiva Muzeja "Alija Izetbegović"

Dan grada Sarajeva i početak opsade

Dan grada Sarajeva obilježen je i ovog 6. aprila uz poštivanje svih epidemioloških mjera.

Naime, 6. aprila 1945. godine Sarajevo je oslobođeno poslije četverogodišnje fašističke okupacije u kojoj su živote izgubile hiljade njegovih stanovnika.

Spomenik na Vracama komemorira 9091 stanovnika grada Sarajeva svih konfesija i etnosa. Sudbonosnost 6. aprila se ogleda u historijskim događajima koji su se zbili 47 godina poslije, kada je zvanično počela opsada glavnog grada Bosne i Hercegovine.

Nepunih pola vijeka nakon kraja Drugog svjetskog rata, Sarajevo se suočilo sa izlivom terora, gdje je plaćena visoka cijena od 11,541 ubijenih građana.

Šestoaprilska nagrada se dodjeljuje istaknutim pojedincima i grupama od 1956. godine.

Nagrada je dodijeljena Aliji Izetbegoviću 1997. godine, gdje je on tom prilikom kazao: "Časno je biti Sarajlija. Kada idemo po svijetu, ljudi nam se dive ne kao pojedincima nego kao stanovnicima nepokorenog grada koji je, iako pod kišom granata, bez struje, vode, plina i hrane izdržao. Današnji dan je uspomena na 6. april 1945. godine kada su protjerani fašisti. To je dan koji Sarajevo sa razlogom pamti i koji će se pamtili".

29. godišnjica priznanja nezavisnosti Republike Bosne i Hercegovine od strane Sjedinjenih Američkih Država

Svakog 7. aprila se vrijedi prisjetiti značajnog datuma u novijoj historiji Bosne i Hercegovine.

Toga dana su Sjedinjene Američke Države priznale nezavisnost Republike Bosne i Hercegovine, i time je priča o uspostavi nezavisnosti i suverenosti dobila jako bitnu međunarodnu podršku.

Ekstenzivna diplomatska aktivnost Alije Izetbegovića je dobrim dijelom rezultovala ovim bitnim historijskim momentom. Čak i prije agresije na našu zemlju, Alija Izetbegović je inicirao sastanke na zvaničnom nivou sa predstavnicima američkog senata, iako tada nije bilo interesa u administraciji predsjednika George H. W. Busha za stvar Bosne i Hercegovine. Tek promjenom administracije na čelu sa predsjednikom Bill Clintonom, dolazi do značajnijeg angažovanja i posredovanja kod uspostavljanja mira.

Tokom rata se naše predstavništvo, na čelu sa Alijom Izetbegovićem, šest puta sastalo sa američkom administracijom. Ostatak će zabilježeno, kada je uloga predsjednika Clintona u pitanju, da je isti dok je još uvijek bio senator Arkansasa inicirao bratimljenje ove američke savezne države sa Republikom Bosnom i Hercegovinom u martu 1992. godine.

Ovo zblizavanje Arkansasa i naše zemlje bilo je rezultat napora jedne grupe Bosanaca na čelu sa dr. Edibom Korkutom, uglednim liječnikom, koji je tada već duži niz godina živio u i radio u Sjedinjenim Državama.

FOTO: Arhiva Muzeja "Alija Izetbegović"



FOTO: Arhiva Muzeja "Alija Izetbegović"

Godišnjica osnivanja Armije Republike Bosne i Hercegovine – 15. april

Mnogoljudna bosanska ratna Armija, koja je srcem i prsima branila Bosnu i njen narod, izvršila je svoj zadatak.

„Vi, vojnici, produžujete tradiciju, velike bosanske ratne Armije! Vi ste baštinici njene slave, i njene ljubavi koju je za nju narod gajio. Ali, vi ste i jezgro buduće snažne i dobro opremljene vojske. Vi povezujete našu prošlost i našu budućnost. Narod se ponosio vama, uvjeren da ste vi najbolji vojnici na svijetu. I jeste! Neprijatelj to zna, i ubuduće će tri puta razmisliti, prije nego što se usudi da digne ruku na zemlju i narod, i narod ove zemlje. Hiljadu devetsto devedeset i druga godina, uz Božiju pomoć, neće se više nikada ponoviti. Braneći Bosnu, vi ste imali čast. Vi niste imali čast samo da branite zemlju. Vi ste branili jednu veliku ideju, koja ima svjetski značaj. To je ideja tolerancije i suživota među ljudima različitih vjera i nacija. Tamo gdje ste bili vi, uprkos svim iskušenjima, ostale su čitave džamije, crkve, katedrale i sinagoge. To je najveća vaša i naša pobjeda. Postupajući tako, vi ste odigrali najveći zalog, u borbi za cjelovitu i demokratsku Bosnu i Hercegovinu. A to znači: za budućnost. Danas je praznik onih koji više nisu među nama, onih koji su ostali na ovom dugom, teškom i vijugavom putu do slobode. Nedavno sam hodio Bosnom. Na sve strane zelene humke. 'Smrtnim sjemenom zemlja je posijana', kako bi rekao pjesnik", kazao je između ostalog Alija Izetbegović u njegovom obraćanju 15. aprila 1997. godine, prilikom smotre jedinica Armije Republike Bosne i Hercegovine na petu godišnjicu osnivanja Armije RBiH na sarajevskom Koševu.

29. godišnjica sudbonosne bitke za Sarajevo i Bosnu i Hercegovinu




FOTO: Arhiva Muzeja "Alija Izetbegović"

Dan kada je odbranjeno Sarajevo, samim time i Bosna i Hercegovina, obilježava se svake godine 2. maja, kada se zbila sudbonosna bitka na ulicama grada 1992. godine.

Vojna sila tadašnje JNA stacionirana u nekoliko sarajevskih kasarni, je otpočela napad na zgradu predsjedništva. Historija je zabilježila da je ovaj prvi pješadijski napad nad grad prošao neuspješno, i jedinice branilaca okupljene oko Teritorijalne odbrane Bosne i Hercegovine su odbranile grad.

Iste noći, došlo je do hapšenja predsjednika Izetbegovića i naše delegacije na sarajevskom aerodromu, nakon povratka sa mirvnih pregovora u Lisabonu.

Dok je naša delegacija još uvijek bila zarobljena na aerodromu, slučajnim sticajem okolnosti uspostavljena je telefonska veza sa Televizijom Sarajevo tokom emitovanja dnevnika kojeg je vodio Senad Hadžifejzović.

Nakon što je Televizija Sarajevo informisala javnost o događajima, uslijedile su intervencije koje su dovele do dogovora po kojem se dan poslije, 3. maja 1992. trebala izvršiti razmjena štaba 2. Vojne oblasti JNA iz kasarne na Bistriku sa našom delegacijom.




FOTO: Arhiva Muzeja "Alija Izetbegović"

Svjetski dan slobode medija – 3. maj

Svjetski dan slobode medija obilježava se 3. maja na osnovu odluke Generalne skupštine UN iz 1993. godine.

Tzv. "Deklaracija iz Vindhuka", donešena na isti dan 1991. godine, koja je promovisala nezavisnost i medijski pluralizam afričkog novinarstva, bila je motivom da se ovaj datum počne obilježavati danom medijskih sloboda na svjetskom nivou.

Smisao obilježavanja dana medijskih sloboda jeste da podigne svijest o njihovoj ugroženosti i da skrene pažnju na brojne diskriminacije u pogledu cenzura i zabrana, kao različitim negativnim oblicima uticaja na rad medija. Esencijalni dio demokratskog upravljanja i progresa jeste pravo slobode mišljenja i govora, što uključuje i slobodu tražena i saopštavanja informacija.

"Cenzure nije bilo ni u toku rata... Nikada nijedan novinar nije od strane države gonjen zbog onoga što je napisao, niti će biti gonjen. Prosto im bilo. Protiv novinara koji su spremeni da lažu, nema lijeka u demokratskoj državi, osim odgajanja naroda i podizanja opće kulture, da bi sami ljudi mogli razlikovati istinu i laž, dobro i zlo. Ali to ne može učiniti politika, može samo kultura. A to je mukotrpan, dugotrajan posao, ali i jedini način... Ako hoćete da ukinete laži, ukinut ćete slobodu. To ide jedno s drugim kao dim sa vatrom." (Doba znanja i strpljenja: Intervjui 1996. – 2003., str. 129)

Dan kada je predsjedništvo Republike Bosne i Hercegovine prihvatilo prijedloge za zastavu i grb

Zastavu sa "zlatnim ljiljanima", koja je bila simbolom borbe i otpora agresiji na Bosnu i Hercegovinu, skoro preko noći su prihvatili svi istinski patrioti naše zemlje.

Usljed potrebe kreiranja nove zastave u kojoj ne bi bili involvirani etnički i nacionalni simboli, poseglo se za srednjovjekovnim periodom u cilju oživljavanja svijesti o viševijekovnoj posebnosti Bosne. Plašt kralja Tvrtka I. Kotromanića, koji je otkriven prilikom arheoloških iskopavanja krunidbene i grobne crkve bosanskih vladara u današnjim Arnautovićima kod Visokog (srednjovjekovni Mili) je iskorišten kao najvrijedniji artefakt za formaliziranje novog bosanskog grba i zastave.

Članovi stručnog tijela, zaduženi još tokom 1991. godine da predstavljaju prijedlog novih državnih obilježja su priložili par prijedloga, da bi, usljed ratnih okolnosti, konačni prijedlog bosanskog grba bio finaliziran od strane profesora Envera Imamovića i dizajnera Zvonimira Bebeke. Četvrti maj 1992. je dan kada je Predsjedništvo uredbom prihvatilo prijedloge za zastavu i grb, nakon čega su srednjovjekovni ljiljani u novom ruhu postali simbolom nezavisne Bosne i Hercegovine.

Francuski filozof Bernard-Henri Lévy je jednom prilikom o Aliji Izetbegoviću napisao: "Vidim njegovu vojničku beretku, toliko malo ratobornu, sa onim bijelim ljiljanima koji su simbol Bosne. Ta beretka u mojoj mašti ima neotuđivo mjesto..."

FOTO: YouTube.com



FOTO: Arhiva Muzeja "Alija Izetbegović"

Peti maj – Dan sjećanja na ubijenu djecu Sarajeva

Vlada Kantona Sarajevo je 5. septembra 2019. potvrdila odluku po kojoj će se ubuduće 5. maj obilježavati Danom sjećanja na ubijenu djecu Sarajeva.

Djeca Sarajeva su u opsadi tokom agresije masovno i pojedinačno ubijana i ranjavana. Podaci i izvori kojima se raspolaže bez sumnje potvrđuju da su zločini nad djecom Sarajeva u opsadi sistematski, organizovano i planski s namjerom izvršavani. Tokom opsade je ubijeno 1601 dijete u Sarajevu. Alija Izetbegović je tokom svojih aktivnosti za vrijeme rata često skretao pažnju na položaj djece, kao najnezaštićenije kategorije.

"Kada je o Sarajevu riječ, mogu Vam sa osjećanjem ponosa saopćiti i jednu vijest, koja se doima kao tračak svjetlosti iz općeg mraka: jučer je u Sarajevu počela nova školska godina. Nastava se ne održava po školama, jer su one ili razorene ili nesigurne, nego po magacinima, podrumima ili garažama. Djeca Sarajeva nakon svih strahota koje su preživjela, a mnogo hiljada njih nije preživjelo, imaju pravo na normalnu školu kao sva druga djeca svijeta. Omogućite im to. Dignite ovu sramnu opsadu grada. Učinite to konačno." (Govor na sastanku Savjeta sigurnosti UN-a – New York, 07.09.1993.)



FOTO: Wikipedia.org

Dan džamija – 7. maj

Islamska zajednica tradicionalno 7. maj obilježava kao Dan džamija, čuvajući tako sjećanje na 614 srušenih džamija tokom agresije na našu zemlju.

Obilježavanjem ovog dana se čuva i sjećanje na banjalučku džamiju Ferhadiju koja je do temelja srušena tog 7. maja 1993. godine, da bi bila obnovljena 23 godine poslije. Obnova Ferhadije i svih ostalih srušenih džamija je bitna jer šalje poruku da se zločin ne isplati, te treba da služi kao opomena i nauk mlađim generacijama.

"Sačuvana Saborna crkva u Sarajevu i srušena džamija Ferhadija u Banjaluci, govore sve o nama i njima. Ovi kameni svjedoci ne lažu i mogu stati nasuprot sve njihove propagande."

„Za mene je tolerancija izvorno religiozna misao – jer je suština vjere u slobodi, a tolerancija je opet, kako rekoh, uvjet Bosne. Tako su u mojoj svijesti te tri stvari povezane: vjera – tolerancija – Bosna. Tolerancija je ono što veže religiju i Bosnu, neka srednja, vezna karika među njima.“ (Doba znanja i strpljenja – Intervjui 1996. – 2003, str. 96-97)

Dan zlatnih ljiljana – 9. maj



FOTO: Arhiva Muzeja "Alija Izetbegović"

Ratno priznanje i odlikovanje "Zlatni ljiljan" se dodjeljuje onim pripadnicima Oružanih snaga Republike Bosne i Hercegovine, koji su se posebno istakli u svom otporu agresoru i iznimno doprinijeli odbrani svojoj hrabrošću i umijećem.

Na temeljima hrabrosti najzaslužnijih pripadnika slavne Armije Republike Bosne i Hercegovine opstala je ideja jedinstvene, cjelovite i nezavisne Bosne i Hercegovine.

Danom Zlatnih ljiljana tradicionalno se obilježava 9. maj, kada se evociraju uspomene na slavnu i časnu borbu jedne Armije koja je opstajala na principima humanosti čak i najtežim ratnim vremenima. Alija Izetbegović kao civilni vrhovni komandant Armije Republike Bosne i Hercegovine je odlikovan "Plaketom sa Zlatnim ljiljanom" 9. maja 2002. godine.

"Danas je najveća čast biti vojnik ovog naroda. Lično osjećam da je to i moja najveća titula ako me neko smatra vojnikom ovog naroda i ove vojske. Vi možda i ne znate to – jer često ljudi o sebi najmanje znaju – šta je naša vojska i kolika je čast biti pripadnik naše armije danas. Vjerujem da ne znate koliki ugled ta vojska ima u svijetu, kod prijatelja i kod neprijatelja."

Dan pobjede na fašizmom – 9. maj

Dan pobjede nad fašizmom se tradicionalno obilježava 9. maja, kada je pobijeđeno do tada najveće zlo oličeno u silama Osovine.

Fašizam kao pojava se javlja u raznim oblicima i na raznim meridijanima i ne mora nužno nositi obilježja koja je imao u prošlosti.

U čast antifašističkih tekovina slavne Armije Republike Bosne i Hercegovine, na 50 godišnjicu povodom Dana pobjede nad fašizmom, Bosni i Hercegovini je ukazana čast da uzme učešća na vojnoj paradi u Parizu 9. maja 1995. Zastavu sa zlatnim ljiljanima je nosio proslavljeni komandant 41. Mostarske slavne i viteške brigade, Semir Drljević - Lovac.

Tog 9. maja 1995. povodom Dana pobjede nad fašizmom Alija Izetbegović je kazao: "Mnogi odgovorni ljudi u svijetu ne kažu da je to bila pobjeda nad fašizmom, jer, očigledno, ona to nije bila. Tada je dobivena velika i značajna bitka protiv fašizma, ali rat protiv fašizma, nažalost, nije bio dobiven. Današnja Bosna je živo i tragično svjedočanstvo te činjenice."

FOTO: Vijesti.ba



Dan bošnjačke nacionalne zastave

Nacionalni praznik Bošnjaka Sandžaka se obilježava 11. maja, na Dan bošnjačke nacionalne zastave.

Tradicionalno se svake godine u proslavu ovog dana, ispred sjedišta Bošnjačkog nacionalnog vijeća (BNV) u Novom Pazaru podiže zastava na jarbolu. Ovaj dan se obilježava počevši od 2005. godine i možemo reći da zastava živi u srcima svih Bošnjaka Sandžaka, te krase brojne ustanove i organizacije.

Alija Izetbegović je uvijek koristio priliku, čak i tokom ratnih godina, da skrene pažnju na izrazito težak položaja Bošnjaka Sandžaka. Ukazivao je nužnost posebnog tretmana ove zajednice u okvirima država u kojima žive.

„U posljednje vrijeme vrlo je česta pojava podjela na domaće i Sandžaklije. To mogu da raade samo dušmani. Pokušavaju u to da unesu neki lažni šarm, spominjući tu i gradsku raju. Ali to je jedna teška podvala. Ne znam da li su ljudi svjesni šta čine na taj način. Mi smo opkoljeni i u Sarajevu smo svi isti, baš svi (...) Otiđite, prebrojte mezarove palih Sandžaklija oko Sarajeva, pa će se oni koji prave razdor posramiti. Ti ljudi su dali živote, oni su se borili zajedno sa nama. Konačno, to je nesretniji dio našeg naroda – onaj dio koji je poslije Berlinskog kongresa ostao tamo preko granice, preko Drine.“

(Robovi biti nećemo – Govori 1990. – 1995, str. 112-113)

FOTO: Facebook/Matica Bošnjačka



FOTO: Arhiva Muzeja "Alija Izetbegović"

Dan odbrane Tuzle – 15. maj

Podsjećanje na herojsku odbranu Tuzle, 29 godina poslije tih događaja ne blijedi.

Predstavnici vlasti, udruženja boraca i bivših pripadnika policije i Teritorijalne odbrane, podsjetili su na dan kada je Tuzla zaslužila svoju slobodu.

Tog 15. maja 1992. godine, kolona vozila, tada već bivše, JNA je prekršila prethodni dogovor o povlačenju iz kasarne "Husinska buna" u pravcu Bijeljine. Pripadnici policije i Teritorijalne odbrane na vatru su odgovorili vatrom, te su tada, po podacima Fondacije "Istina, pravda, pomirenje" na Brčanskoj Malti poginula 3 pripadnika SJB Tuzla i 33 vojnika JNA iz kolone.

Odbrana bosanskohercegovačkih gradova u prvim danima agresije na našu zemlju, velikim dijelom je počivala na samoorganizaciji onih ljudi koji su u teškim vremenima vidjeli dalje od mnogih.

FOTO: Arhiva Muzeja "Alija Izetbegović"



Godišnjica Pofalićke bitke



FOTO: Arhiva Muzeja "Alija Izetbegović"

Druga faza bitke za Sarajevo u početnom periodu agresije na našu zemlju, se odigrala 16. maja 1992. godine na širem rejonu naselja Pofalići.

Dobro koordinisanom akcijom više odreda tadašnje Teritorijalne odbrane Bosne i Hercegovine i vojne policije krenulo je u akciju oslobađanja naselja Pofalići koje je u strateškom smislu visoko kotiralo, i predstavljalo tačku preko koje se trebalo izvršiti planirano presijecanje Sarajeva, i spajanje sa jedinicama agresora na Grbavici.

Pofalićka bitka, kodnog naziva "Grom", je počela u jutarnjim satima 16. maja 1992. godine, kada je agresor osujećen u svojim namjerama, a do kraja dana je došlo do ovladavanja cjelokupnom teritorijom Pofalića. 16. maj se također obilježava i kao dan općine Novo Sarajevo.

Na 29. godišnjicu jedne od presudnih bitaka za odbranu Sarajeva, pripadnici jedinica koji su tada učestvovali u bici su se podsjetili na ovaj važan historijski događaj.

FOTO: Agencija Anadoluja



Međunarodni dan Muzeja – 18. maj



FOTO: Agencija Anadoluja

Muzej "Alija Izetbegović" je usljed epidemioloških mjera koje su još uvijek na snazi, onemogućen da obilježi Međunarodni dan muzeja na način na koji je to rađeno ranijih godina.

Zbog toga je dat veći značaj ulozi društvenih mreža u promociji rada i djelovanja muzeja, kao i same postavke. Muzej "Alija Izetbegović" svakog petka u okviru rubrike "Upoznaj Muzej" objavljuje po jedan eksponat iz stalne muzejske postavke.

Također, svake srijede već par mjeseci ide redovna rubrika "Prijatelji i saradnici Alije Izetbegovića", želeći na taj način probuditi interes za recentnu historiju naše zemlje.

Međunarodni dan muzeja se obilježava 18. maja svake godine pod patronatom Međunarodnog vijeća muzeja (ICOM). Počevši od 1977. godine plan i cilj obilježavanja međunarodnog dana muzeja je intenzivnija angažiranost sa lokalnom zajednicom i podsjećanje na značaj i ulogu muzeja kao institucija koje prevashodno služe društvu i unaprjeđuju ga.

FOTO: Agencija Anadoluja



JU MUZEJ
"ALIJA IZETBEGOVIĆ"
VAS POZIVA DA UČESTVUJETE U PRVOJ

LJETNOJ
ŠKOLI
Diplomatije

AUGUST 2021.


MUZEJ "ALIJA IZETBEGOVIĆ" SA PONOSOM PREDSTAVLJA

IZABRANA DJELA ALIJE IZETBEGOVIĆA

"ISLAMSKA DEKLARACIJA", "ISLAM IZMEĐU ISTOKA I ZAPADA",
"SJEĆANJA", "MOJ BIJEG U SLOBODU"

KOMPLET KNJIGA JE DOSTUPAN U SUVENIRNICI MUZEJA, A
MOGUĆE GA JE NARUČITI I PUTEM MAILA
(MUZEJALIJAIZETBEGOVICI@GMAIL.COM)

ILI POZIVOM NA BROJ +387 33 574 271
CIJENA KOMPLETA IZABRANIH DIJELA IZNOSI 150 KM.



OFICIJELNI
DISTRIBUTER

